

OTSIPATAPOJACACA ITIONCAQUECA

JOANCA

Antsatantaquemparoca

Ocatia iroguenti antsatantaquemparoca otsipatapojatsica itioncaqueca Joanca. Irio jorio poneanquitsica quepatsiqui icantajitica Garirea, irio itigarancane Jesoshi. Tequeratagueti incajemeriji Jesoshi, itsipatacari iguentijeguite pajitatsica Santiago, iquitsajiaque. Irocashi itioncacotaqueri irira Joanca paperiqui Yantajiguica 3.1–4.22. Iquenquejajitaque itioncaquero ocatia paperi ichoocaqueguetti Epesoqui, atsajiaquetari iriguenti quempoguijajiguirica quemisantajatsica Epesoquitica. Iquenquejajitaque irira Gayo itioncaqueneca iguintenitaca quepatsiqui pajitatsica Paritia. Tee intsajiteji quero ajagantsini itioncaquero ocatia paperi, cotanquitsi chooca quenquejajianquitsica itioncaquero arica ajagantsini 87, irooca otsipa ajagantsini arejevaetaro ajagantsini 90, tequerataguetti intionqueroji ivaperite catsantsatanquitsica pajitatsica *Quenquetsatsarentsi Oganenjencatatsica Itioncaqueca Joanca* itsavetacotaqueriguetti Jesoquirishito, aisa tequerataguetti intionqueroji otsipa pajitatsica *Yonigaajiguequerica Joanca*.

Joanca itioncaciaqueneri Gayo cameetsaniji incantajiaqueri iriatimpa aisa Irimittio ishinevaetaca yamenajiaqueriguetti icomajamajajiaca, cotanquitsi tee irishineventemparoji yantaqueca Tioterepeshi.

Joanca itioncaqueneri Gayo

¹Imaica, nopintsatacaca Gayo, nonintaque nontioncaquempi paperi. Naatimpa naroguenti quempoguijajiguirica quemisantajatsica. Arimaja nopintsamajaquempi.

Gayo icavintsajajiaqueriguetti maasano quemisantajatsica

²Napiguemisanaritenei nopintsatacaca, namanacoventaquempi cameetsanijite pincoguitempaninijite pinchoocataque

cameetsa, aatoniji pojoquijita, onquejeta-quempa pichoocaqueguetti cameetsa pishirequi pishinevaetaca. ³Oraqueate icoraquejiaqueguetti apiguemisanitarijiatei icamantapojanaquea picomajamajatanaca pinetsanamajatanaquero Quenquetsatsarentsimajaca. Noshinevaetanacaqueate noquemacotaquempiguetti. ⁴Caavijitarite oguishinejamajataquena noquemacojiaqueriguetti nirijanijiate^a inetsanamajajiaquero Quenquetsatsarentsimajaca.

⁵Nopintsatacaca, cameetsavaequete picavintsajajianaqueriguetti

a 4 Iquenquevarivaetanaqueguetti irira Joanca icantiri “irijani” maasano quemisantajiaquerica Amajirote Jesoquirishito.

maasano quemisantajatsica, irira pigonorojia aisa itsipapae teeca pinejavetempariji. ⁶Irraqueate coraquejianquitsica acaniqui icamantajiaqueri quemisantajatsica icapiocajiacagueti icantajiaqueri pipintsamajiacari. Imaica nonintaque picancani pinquejetajempa imaica iroajianaquegueti oraniqui, coajica iroajianaquegueti pojocajiaqueneri maasano icoguitejjacaca cameetsanijite irishineventaquempiniji Aapani Irioshi. ⁷Irooquea yoantanacaca yoantanacarotari ivajiro Jesoquirishito, cotanquitsiquea irirajia teeca intsarorentempariji Aapani Irioshi teequea iramitacojigueriji, tecatsi irojocajigueneriji. ⁸Aroquentijiaqueate jocajiaquenerine maasano taaca inintajiaque cameetsanijite amitacojiaqueri itsavetantajiaquerogueti Quenquesatsarentsimajaca.

⁹Notioncajiavetacanari quemisantajatsica capiocapinijiatsica oraniqui, cotanquitsi iriraqueate Tioterepeshi mana yanaimanatanaquena intati tee inquemisantenaji naatimpajia. ¹⁰Imaquea imaica noncoraquequitegueti pincapiocajiaquempagueti noncamantamajajiaquempi maasano aviatimpajia quero icocani iriatimpa, inijashiquenatarite intati. Cotanquitsi tee apaniro onchoocateji ocatica. Oraqueate

yoajianaquegueti apiguemisantarijiateni tee iraaajiaqueriji aisa icatsimatimentajiaqueri quericaca nintavetanquitsica iraaajiaqueri, ariquea icantimentajiaqueri inconoajiajemparimequeate capiocajianquitsica.

¹¹Imaica, napiguemisantariteni, aato piquejetari antiroca teeca oncameetsateji. Iriguenti pinquejejiacquempa comajamajajatsica. Irira comajamajajatsica iriguenti ashintari Aapani Irioshi, cotanquitsi irira antajiguiroca teeca oncameetsateji tee intsateriji Aapani Irioshi. ¹²Maasano icamantacojiguiiri Irimitio, yamenajiaqueritarite inetsanamajatiro Quenquetsatsarentsimajaca. Ariqueate noquejejiaca naatimpajia nocamantacojiaqueri. Aviatimpa pitsataque tee namataajiguempaji.

¹³Nonintavetaqueate noncamantamajajiaquempime maasano, cotanquitsi tee noninteji nontioncaquempi paperiqui. ¹⁴Noninquetarite nonejaquitempi ariqueate anquenquetsatavacaajiaquempa. ¹⁵Noninque pinchoocaque cameetsa. Ariqueate ichoocajiaque acaniqui atsipavijijiacaca, inintajiaque incamantajiaquempiqueate iquenquejiaquempi. Naatimpa nonintaque inchiquiojita pincamantajiaqueri maasano atsipavijijiacaca apaniropae choocana noquenquejiaqueri.